

五礼通考

第十一
卷

五禮通考卷第二百四十二

內廷儀禮部右侍郎金匱秦憲用編輯

翰林院侍讀學士嘉定王鳴盛

參校

李保_{總督}肅_肅觀_{桐城}方觀承同訂

直隸按察司副使元和宋宗元

軍禮十

田獵上

蕙田案田獵之禮起於皇古傳曰古者聖人
舉事必反本五穀者以奉宗廟養萬民也禽
獸多則害稼穡故田獵以其承宗廟示不忘
武備因以爲田除害也是以師之六五取象
於田有禽程子以爲寇賊姦宄爲生民之害
若禽獸入於田中侵害稼穡於義宜取則獵
取之其義精矣至於順天時因地利備賓祭
蒐軍實習勞懲怠辨尊明卑舉一事而眾善

皆備者此也自秦漢以下每代皆有田獵之事今折衷於周官考其沿革以類相附焉

易繫辭包犧氏作結繩而爲網罟以佃以漁蓋取諸離屯卦六三卽鹿无虞惟入于林中君子幾不如舍往吝象曰卽鹿无虞以從禽也君子舍之往吝窮也

趙氏汝楳曰田者必夷其險阻虞人設驅逆之車使禽趨田然後有獲无虞不驅禽卽我我反從禽故曰卽鹿也

師卦六五田有禽利執言无咎

何氏楷曰於師言田者古人一歲三田所以習武事也班孟堅云禽者鳥獸之總名言爲人所禽制也華氏學泉曰奉辭伐罪如害稼之禽執之有辭所謂田有禽利執言也

比卦九五顯比王用三驅失前禽邑人不誡吉

程傳先王以四時之畋不可廢也故推其仁心爲三驅之禮乃禮所謂天子不合圍也成湯祝網是其義也天子之畋圍合其三面前開一路使之可去不忍

盡物好生之仁也只取其不用命者不出而反入者也禽獸前去皆免矣故曰失前禽也王者顯明其比道天下自然來比來者撫之固不煦煦然來比於物若田之三驅禽之去者從而不追來者則取之也

恆卦九四田无禽

朱子曰以陽居陰久非其位故為此象

解卦九二田獲三狐得黃矢貞吉

朱子曰大抵此爻為卜田之吉占

錢氏一本曰獲三狐小人狐媚之險至二而無不解得黃矢君子中直之道至二而無不行

巽卦六四悔亡田獲三品

折中曰四居高當位載贍武功而田害悉去解獲三狐而此獲三品所獲者多矣

周禮春官大宗伯大田之禮簡眾也

注古者因田習兵閱其車徒之數

王氏昭禹曰坐作進退不講則不知刺伐擒縱不習則不能春以振旅夏以變舍秋以治兵冬以大閱此所以簡其能也

又曰攻闕而冒矢石人情之所不欲馳騁而逐禽獸人情之所同欲以人情之所不欲者寓于所同欲之間此人情樂爲之用而四時教戰所以皆寓于田

天官太宰以八則治都鄙八曰田役以馭其眾

王氏昭禹曰田以簡眾役以任眾

禮經會元春蒐夏苗秋獮冬狩雖云農隙以講事然以四時講武使民奔走服役之不暇終身擾擾不得休息豈先王使民之政乎大抵成周致軍其於六鄉六遂之民本不盡用也雖曰田與追胥竭作必隨遠近之地而遞征之何嘗一一盡致於司徒而聽教於司馬也辨鼓鐸則有軍將師帥旅帥卒長兩司馬公司馬之屬辨號令則有羣吏百官帥家縣鄙鄉野之屬辨旗物則有諸侯羣吏帥都鄉遂郊野百官之屬四時必隨其地之遠近帥屬而遞教之矣大司馬於四時之田亦姑總其大綱言之爾如此盡舉畿內之

民而教之吾恐所田之野四表相去才三百五十步爾雖容百官且不足況六軍乎都鄙去王城五百里雖一年調發且不可況四時乎

蕙田案葉氏此條得古人馭眾之意

小宰以官府之六聯合邦治五曰田役之聯事

禮經會元成周田獵之制見於他官如大司徒則以旗致民小司徒則會卒伍以作田役鄉師則前期出田法簡其鼓鐸兵器修其卒伍州長則帥民而致之黨正則作民而治其政事族師則合其卒伍簡其兵器以鼓鐸旗物帥而至縣師則受法于司馬作其眾庶牛馬車輦會其卒伍旗鼓兵器帥而至遂人則作野民帥而至遂師則平野民縣正則用野民帥而至稍人則以縣師之法作其同徒輦輦帥而至以聽於

司馬鼓人則掌六鼓四金以正田役司常則贊司馬
頒旗物及致民置旗弊之此田獵致民之禁令見於
他官者然也山虞則萊山田之野及弊田植旗于中
致禽而珥焉澤虞則萊澤野及弊田植虞旌以屬禽
迹人則掌邦田之地爲厲禁而守之牧師則贊焚萊
獸人則時田守呂及弊田令禽注于虞中小宗伯則
帥有司而饁獸于郊遂頒禽肆師則四時田獵祭表
貉則爲位甸祝則致禽于虞中乃屬禽及郊饁獸合
奠于祖禰乃頒禽田僕則設驅逆之車小子則斬牲
左右徇陳此田獵致禽之禁令見於他官者然也成
周田政必分掌於六官之屬以其皆預田也而四時
教法則大司馬實總之是以仲春而教振旅平列陳
辨鼓鐸鐃鐃之用遂以蒐田祭社仲夏而教芟舍撰

車徒讀書契辨號名之用遂以苗田以享祔中秋而
教治兵辨旗物之用遂以獮田以祀祔中冬而教大
閱則合三時之所辨者而皆辨之遂以狩田以享烝
則大司馬因講武以寓田因致禽以修祀其禮然也
蕙田案葉氏此條實所以發明田役聯事之
意

觀承案田獵之禮大矣古者寓兵於農亦卽
寓戰於獵蓋戰不可試也惟因爲田除害且
可供祭祀待賓客故教民田獵卽於此簡車
徒練軍實辨鼓旗備行陣所以教其坐作進
退之方馳驅控縱之節已無不周至而其民
惟知踴躍鼓舞以及時趨赴各有所得而反
不知其戰陣之法已熟練於平素而無不精

矣此古禮之妙所以使人悅而忘勞者也

禮記仲尼燕居以之田獵有禮故戎事閑也

陳氏禮書周官四時之田春蒐以教振旅夏苗以教
芟舍秋獮以教治兵冬狩以教大閱鄉師於凡田前
期出田法於州里簡其兵器脩其卒伍山虞萊山田
之野澤虞萊澤野而大閱之禮爲表百步則一表爲
三表又五十步爲一表田之日司馬建旗于後表之
中羣吏以旗物帥民而致質明弊旗誅後至者羣吏
聽誓於陳前教以坐作進退之節遂以狩田以旌爲
左右和之門羣吏各帥其車徒以敘和出左右陳車
徒有司平之旣陳乃設驅逆之車有司表貉于陳前
中軍以鼙令鼓銜枚而進獲者取左耳然則虞人所
萊之野穀梁所謂艾蘭以爲防是也以旌爲左右和

之門穀梁所謂置旃以爲轅門以葛覆質以爲紼是也其未田也教戰於此及田則驅禽以入天子發則抗大綏諸侯發則抗小綏諸侯發然後大夫士發置虞於其中以致禽焉小宗伯帥有司而饁獸於郊遂頒禽則饁獸于郊者月令所謂旣田命祠祭禽四方是也頒禽詩傳及穀梁所謂擇取三十爲俎其餘以予大夫士是也田之服則冠弁服車則木路旗則大麾弓則夾弓庾弓矢則鏃矢殺矢其出也用牲于社宗而載之行其止也張幕設重帟重案而於是臨誓先王之於田宜社造廟祭馬祖繼之以饁獸于郊慎之至也

蕙田案陳氏此條敘田獵始終儀節正記所云有禮者也

王制無事而不田曰不敬田不以禮曰暴天物

春秋隱公五年左氏傳臧僖伯曰春蒐夏苗秋獮冬狩

皆於農隙以講事也三年而治兵入而振旅歸而飲至

以數軍實昭文章明貴賤辨等列順少長習威儀也鳥

獸之肉不登於俎皮革齒牙骨角毛羽不登於器則君

不射古之制也疏爾雅釋四時之獵名與此同周禮大司馬職中春教振旅中夏教茆舍中秋教治兵中冬教大閱其名不與此同

桓四年公羊傳曰春曰苗秋曰蒐冬曰狩三名既與禮異又復夏時不田穀梁傳

曰四時之田皆為宗廟之事也春曰田夏曰苗秋曰蒐冬曰狩皆與禮異者良由

敬言既絕曲辨妄生邱明親受聖師故獨與禮合明帝集諸學士作白虎通義因

穀梁之文為之說曰王者諸侯所以田獵何為苗除害上以其宗廟下以簡集土

眾也春謂之田何春者歲之本以本名而言之也夏謂之苗何擇其懷任者也秋

謂之蒐何蒐索肥者也冬謂之狩何守地而取之也四時之田總名為田何田除

害也案苗非懷任之名何云擇去懷任秋獸盡皆不瘦何云蒐索取肥雖名通

蕙田案經傳所說四時之田異說甚多周禮

左傳四時皆田公羊注夏時不田其異一周

禮蒐苗獮狩歲歲皆行左傳治兵振旅三年

一舉其異二周禮左傳以蒐苗獮狩分春夏
秋冬公羊春苗秋蒐穀梁春田秋蒐其異三
案大宗伯言大田之禮則田者總名何故專
屬之春賈誼新書亦謂夏不田何也曰天地
陰陽盛長之時猛獸不攫鷙鳥不搏蝮蠆不
螫鳥獸蟲蛇且知應天而況人乎哉此說似
亦近理然周禮明有夏苗則亦不足據也餘
三說亦當以左傳爲正

賈誼新書王者諸侯所以田獵者何也爲田除害上
以供宗廟下以簡集士眾也蒐苗獮狩之禮簡戎事
也苗者毛取之蒐者搜索之狩者守留之謂之畋何
去禽獸害稼穡者故以田言之孝子已有三牲必田
狩者以爲己之所養不如天地自然之牲逸豫肥美

也

劉向說苑謂之畋何聖人舉事必反本五穀者以奉宗廟養萬民也去禽獸害稼穡者故以田言之聖人作名號而事義可知也傳曰春曰蒐夏曰苗秋曰獮冬曰狩百姓皆出不失其馳不抵禽不詭遇逐不出防此蒐苗獮狩之義也故蒐苗獮狩之禮簡戎事也

右田獵名義

春秋桓公四年公羊傳春曰田夏曰苗秋曰蒐冬曰狩
蕙田案何休以公羊夏苗但去害苗而不田

獵

穀梁傳春曰田夏曰苗秋曰蒐冬曰狩四時也四用三焉

蕙田案此即夏不田之說傳意謂有此禮而

不常用也可與月令孟夏毋大獵相發明

禮記月令季春之月田獵置罟羅網畢翳餒獸之藥毋

出九門

注為鳥獸方孚乳傷之逆天時也獸罟曰置罟鳥罟曰羅網小而柄長謂之畢翳射者所以自隱也凡諸罟及毒藥禁其出九門明其常有時

不得用耳天子九門者路門也應門也雉門也庫門也皋門也城門也近郊門也遠郊門也關門也疏路門內有者不得出路門應門內有者不得出應門舉此可以知之

孟夏之月驅獸毋害五穀毋大田獵

陳氏澣曰夏獵曰苗正為驅獸之害禾苗者與三時大獵自不同

季秋之月天子乃教于田獵以習五戎班馬政

注教于田獵因田獵

之禮教民以戰法也五戎謂五兵弓矢戈矛戟也馬政謂齊其色度其力使同乘也校人職曰凡軍事物馬而頒之

仲冬之月山林藪澤有能取蔬食田獵禽獸者野虞教

道之其有相侵奪者罪之不赦

王制獺祭魚然後虞人入澤梁豺祭獸然後田獵鳩化

為鷹然後設罝羅

注取物必順時候也梁絕水取魚者罝小網也疏案月令正月獺祭魚孝經緯云獸蟄伏獺祭魚則十月中

也是獺一歲再祭魚此下文鳩化為鷹草木零落交相連接則獺祭魚謂十月時魯語里革云鳥獸孕水蟲成于是乎禁罝罽網然則正月雖獺祭魚虞人不得入澤梁月令九月豺乃祭獸夏小正十月豺祭獸則是九月末十月之初豺祭獸後可以田獵鳩化為鷹者謂八月時但鳩化有漸故月令季夏云鷹乃學習孟秋云鷹乃祭鳥其化為鷹則八月也以月令二月鷹化為鳩則八月鳩化為鷹也周禮司裘云中秋獻良裘鄭司農云中秋鳩化為鷹是也設罝羅者說文云罝捕鳥網也又爾雅云鳥罝為羅罝羅總是捕鳥之網

蕙田案玩此條知古人田獵重於秋冬春夏雖有其制而不備也考之經傳謂四時皆田者周禮左傳穀梁傳也謂夏不田者公羊傳何休注及春秋緯運斗樞也何休竟以夏無田獵譏穀梁為短固屬非是鄭康成則以緯書為孔子所作四時田者周制三時田者夏殷制孔子欲改周制不敢顯露陰書于緯而于春秋則仍用周制其說穿鑿而害道皆未細玩月令季春羅網毋出孟夏毋大田獵及

穀梁四用三焉之義觀王制獺祭魚云云亦專指秋冬又云天子諸侯無事則歲三田卽周禮所載儀節亦惟治兵大閱特詳于振旅芟舍古聖人順天時以取物因農隙以講武春夏生長之候決不肯多殺以擾民也然四時皆有農隙而武備不可以不時肄故斟酌于四時之中而有詳畧之別焉其義精矣觀承案周禮四時皆田以四時皆有農隙則乘其隙而行之可也然王制已有天子諸侯無事則一歲三田之文蓋夏禾方盛於田獵原不甚相宜因思宣王車攻詩特標出之于苗句此與六月之詩同意蓋宣王非無事之時旣盛夏興師又行夏苗之禮以習軍陣

也則平日之田不必四時皆行故周禮尤詳
大閱之禮而豳風一之日于貉二之日載纘
武功亦總在冬時然則田雖備四而行之當
酌其宜要惟秋冬爲重也

右田獵時令

周禮天官獸人掌罟田獸辨其名物

注罟網也以網搏所當田之獸疏名物者謂獸皆

有名號物色也案夏官四時田獵春用火夏用車秋用羅冬用徒四時各以其一爲主無妨四時兼有網也

冬獻狼夏獻麋春秋獻獸物

注狼膏聚麋膏散聚則溫散則涼以救時之苦也獸物凡獸皆可獻也及狐狸

疏丙則狐去首狸去正脊二者並堪食之物

凡田獸者掌其政令

王氏曰畋狩有時王制獺祭魚然後虞人入澤梁云云是也取獸有法如不麇不卵不殺胎不殀天不覆巢踐毛不獻不成禽不獻是也田獵有地如東有甫草駕言行狩是也及夫辨其死生蠶薨之物當

公當私之宜斷其爭禽之訟皆所謂政令也

地官迹人掌邦田之地政爲之厲禁而守之

注田之地若公苑也疏迹人